

Supervizor za Brčko izdao je dva naloga kojima se regulira korištenje vaučera, sertifikata i Markovićevih dionica u procesu privatizacije u Brčko Distriktu

Supervizor za Brčko, Henry L. Clarke, izdao je dva naloga kojima se regulira korištenje vaučera, sertifikata i Markovićevih dionica u procesu privatizacije u Brčko Distriktu Bosne i Hercegovine.

Cilj naloga je uspostava sistema upravljanja i zaštite manjinskog dioničarskog kapitala u privatiziranim poduzećima.

Prvim nalogom osniva se Manjinski dioničarski fond Brčko Distrikta koji će upravljati dioničarskim kapitalom rezerviranim za korištenje vaučera i sertifikata u privatiziranim poduzećima Brčko Distrikta. Fond će biti dio Ureda za privatizaciju Brčko Distrikta i na čelu Fonda će biti direktor koga će imenovati gradonačelnik Brčko Distrikta. Osnivanje Fonda je postalo neophodno nakon što se za više od godinu dana entiteti nisu mogli dogovoriti oko korištenja vaučera i sertifikata u Brčkom. Obzirom da je Brčko Distrikt u poodmakloj fazi procesa privatizacije, supervizor je zaključio da bi se vaučeri i sertifikati trebali investirati u posebna poduzeća prema planovima koje su izradile Republika Srpska i Federacija prije uspostave Brčko Distrikta.

U roku od 60 dana od dana stupanja na snagu Naloga supervizora, Ured za privatizaciju Brčko Distrikta mora

poduzeti niz mjera u cilju priznavanja vaučera koji su već registrirani u poduzećima kao i registriranje vaučera i sertifikata koje stanovnici Brčkog nisu registrirali u toku privatizacije u skladu sa prethodnim nalogima supervizora.

Drugim nalogom se Ured za privatizaciju obvezuje da će obezbijediti da se konvertuju Markovićeve dionice u ekvivalentne dionice u privatiziranim poduzećima te da se konvertovane dionice zakonito prenesu na zakonske vlasnike Markovićevih dionica.

Nalog stupa na snagu odmah i biće objavljen u "Službenom glasniku Brčko Distrikta".

Molimo Vas da se za dodatne informacije obratite Suzani Pejčić, službeniku OHR-a za odnose s javnošću, na telefone +387 (0) 49 205 666 ili +387 (0) 61 133 526.